



Hessischer Rundfunk: hr1-Zuspruch

Mittwoch, 8. September 2010

hr1 - mo. - fr. 5.45 Uhr, sa. 7.15 Uhr

Pfarrer Helwig Wegner-Nord
Frankfurt am Main

De Karl

Mein Bekannte, de Karl, geht de Sache gern uf de Grund. Also net bloß an de Oberfläsch gekratzt, sonnern rischtisch ma nachgebohrt. Wer, wo, wieviel, seit wann un so weider. Wann aaner zum Beispiel sacht: wahrscheinlich reschents mojn, dann will de Karl wisse: was haaßt dann des? Reschents oder reschents net? Un wenn, wie lang un wie heftisch?

Manschma heißt's im Wedderberischt ganz genau: Morje liescht die Reesche-Wahrscheinlichkeit bei 74 Prozent, zum Beispiel. Oder aach blooß bei 10. Des sin doch ma handfeste Zahle. Obwohl: ganz sischer is sisch de Karl aach widder net, was des in escht bedeute duht. Also wann er jetzt ema mojns rausgeht: 10 Prozent Reschewahrscheinlichkeit? Heißt des jetzt, dess es von dene 24 Stunne knapp 2,4 reschent? Od der dess nur 10 Prozent der Fläsche von seim Ort nass wird? Himmel, er will doch nur wisse, ob er en Scherm mitnehme soll. Der Karl macht sisch jetzt als en Spaß draus, die Sach ma rumzedrehe: 10 Prozent Reschewahrscheinlichkeit sin 90 Prozent Sonnewahrscheinlichkeit. Un wann er damit reschne derf, nimmt er eher kaan Scherm mit, höchstens sei aal Anoräksche, wo hinne e Kapuz zum Enausziehe hat.

Mein Bekannte lässt sisch schon von Zahle beeindrucke, aber manschma hadder des Gefühl, es wär besser, ze wisse, was mer dun soll, als sisch mit dere Stadisdik zefridde ze gebbe. Jetzt hat ja letzt Woch der Herr Sarrazin geschribbe un enausposaunt, dess bei de Mensche die Intelligenz zu 50 oder sogar noch mehr Prozent angeborn is. Dess die Intelligenz also wie die Haarfarb vor allem in de Gene liescht un dess deswesche die Kinner von Dumme dumm bleiwe. Un dann hadder noch weider mit dene Zahle un Gene rumjongliert, hat gemaant, dess die eingewanderte Muslime annere Gene ham als wie Deutsche – un dess des alles forschbar wär, weil die immer mehr wern un die Deutsche immer wenischer. Korz un gut, de Karl hat schon geroche, dess des



Hessischer Rundfunk: hr1-Zuspruch

Mittwoch, 8. September 2010

hr1 - mo. - fr. 5.45 Uhr, sa. 7.15 Uhr

Pfarrer Helwig Wegner-Nord
Frankfurt am Main

so e Art statistischer Rassismus is, wo hinne un vorne net stimme konnt. Er jedenfalls könnt genüschend Geschebeispiele dedefier nenne, dess des, was un wie e Kind lerne kann, dess des an allem Möglische liescht, an de Schul, an sei Umgebung, halt an de Chance, wo son Klaanes kriecht – aber doch net an de Gene!

Was mache also die ganze faszinierende Zahle mit eim? (Zumindest wann se ma stimme sollde!) Se könne ein deprimiern und verrückt mache. Odder aber, mer dreht die Sach grad wie bei der Reeschewahrscheinlichkeit ema rum und saacht: wann angeblich bloß fuffzisch Prozend geerbt un festgelescht sin, dann is ja die anner Hälft noch da, um intelligent ze wern. Un dass dann aaner am End intelligenter is, als wie Herr Sarrazin gedacht hat, die Chance dafür stehn mindestens ma fifty-fifty. Meint de Karl.